

Evelyn Wever-Croes

TENIENDO TUR OPCION HABRI

Nos a conoce hopi aña como Hefe na Inspectie der Belastingen y su cara ta conoci pa su trabounan den Quota International aki na Aruba, Evelyn Wever-Croes (40) a cambia di sector publico pa sector priva 4 aña pasa. Awendia su nomber un biaha mas ta circula pa reemplaza un minister of pa drenta politica. Capacidad y preparacion pa un puesto asina, sigur e tin, pero e tin e interes?

Mi a caba Colegio Arubano na aña 84, mi tabata di bay studia medicina pa bira doctor.

Despues di 6 luna na Costa Rica heime wee a gan'e y el a bolbe Aruba. Evelyn e ora, a dicidi pa cuminsa studia ley na e dependance di UNA (Universiteit van de Nederlandse Antillen) na Aruba. Despues di a haal e kandidaatsfase, e dependencie a cera, el a sigui studia fiscaalrecht na Universidad di Leiden. Gradua, e tabatin apenas 22 aña y dia 15 September 1989 el a drenta como aanslagregelaar na Inspectie der Belastingen. E tempo ey Sr.Yubi Toppenberg y djey Sr. Angel Gomez Osorio tabata e hefe. **Despues di tempo, Sr. Osorio a bay Corsow pa traha y Gobierno a dicidi cu nan ta busca un Hulandes na su lugar. Ami mes tabatin apenas 2 aña trahando, e bon ta cu ami a keda nombra su counterpart y 'plaatsvervangende hoofd van dienst' di e hefe y asina mi a acumula hopi mas experiencia.** Na April '94, e Hulandes a bay bek y consecuentemente, Evelyn a asumi e posicion di hefe di Inspectie der Belastingen pa 9 aña te cu 1 di April, 2003. E tempo ey e departamentonan di Belasting tabata reparti, cu Directie Belastingen na cabez, Douane cu nomber oficial 'Inspectie Invoerrechten en Accijnzen', 'Inspectie der Belastingen', 'Ontvanger der Belastingen' y 'Belastingaccountantsdienst', y e intencion tabata pa despues, tur e departamentonan aki keda integra den un solo departamento. Un decision cu tabata hopi necesario segun Evelyn, pa motibo cu como cliente,

dus e pagado di impuesto, bo sa cu ken bo mester trata cune. Evelyn ta splica cu e cambio pa traha integral, a tuma lugar na Hulanda hopi tempo pasa caba. E proceso na Aruba sinmebargo a tarda pa motibo cu gobierno mes no tabatin esaki como un prioridad. E gobierno cu a sinta despues cu Sra. Evelyn Wever-Croes a bay como hefe, si a pone esey como nan prioridad y e cambio a sosode. Durante di e añanan tabata encontra hopi problema manera informacion cu tabata bay perdi, e falta di cooperacion entre e dienstnan, e automatizacion bieuw, cu no tabata por a handel tur e trabou. Hopi trabou tabata bay manual pa procesa 20-mil aangifte anualmente. E edificio tabata y ta inadecuado, pa e empleadonan y pa e publico. **E parti mas importante cu a wanta e departamentonan riba pia ta e hendenan. Y nos sa tende storia di ambtenaar, pero ami por bisabo cu e mayoria ambtenaar na nos dienst tabata traha duro, naturalmente semper tin hende cu ta dañá pa otro pero mi no ta gañabo, ami ta sigur cu e éxito di cualkier departamento ta e hendenan.** Awor nos ta algun aña mas leu y ainda e re-organizacion no a yega e nivel di eficiencia cu gobierno kier pa motibo di e hendenan clave cu constantemente ta sali for di Gobierno.

En total Evelyn Wever-croes a keda 13 aña y mei na trabou y e tempo ey tabatin masha speculacion di kico realmente a sosode, pa causa su salida. **Den prome instante, e decision pa despues di tanto**

tempo bandona servicio di gobierno tabata personal, principalmente pa busca un otro reto. Mi tabatin 13 aña na gobierno, mi a keda pa motibo di mi responsabilidad, apesar cu mi a mira hopi colega bay sector priva. E no ta un secreto cu mi tata (Hendrick Croes-abogado) tin su oficina aki mas cu 30 aña y e unico cu a studia den e mesun direccion parecido tabata ami. Sinembargo despues cu a tuma a tuma e decision ey, e posicion di director di belasting a bira vacante, algo cu mi no a spera den un tempo asina cortico, el a sosode net tempo cu mi a tuma mi decision. Gobierno a caba di dicidi na e momentonan ey cu nan ta bay haci e reorganizacion di e departamento y bay over pa un sistema di automatizacion moderno, y mi a mir'e como un oportunidad nobo pa un periodo di 2 pa 3 aña. E tabata un reto pa 'overbrug' e cambionan cu tabatin pendiente. Ora mi a pensa cu hendenan completamente nobo lo bay keda na encargo di e proyectonan grandi aki, mi a pensa di postpone e fecha di mi retiro. Sinembargo Gobierno mes no tabatin e necesidad ey y a tuma decision pa otro persona haya e puesto. **Ora cu mi a bay traha na Gobierno, mi tabatin cierto minister a bisami, 'mi ta respetabo como profesional pero politicamente bo mester sa cu mi no ta gustabo' y mi tabata bisa nan cu no lubida cu ami no ta politico sino un profesional. Pues mi mester a traha hopi duro pa muestra nan cu mi no ta mete cu politica den mi trabou. E tin 4 aña caba**

**“MI TA KERE
CU SI CIERTO
MOMENTO UN
APELACION KEDA
HACI RIBA MI Y E
TA NA BIENESTAR
DI PAIS ARUBA...
LO MI PENSE
HOPI BON”**

na e oficina di su tata y ta sinti cu el a custrumbra cu e trabou awor na e otro banda di mesa. **Ami ta haci asunto di belasting di clientenan.** Mi ta hayami ta traha cu hopi compania comercial. Esaki ta e unico oficina di abogado cu tin un departamento di fiscalista dus di belasting, nos ta haya hopi cliente stranhero cu kier establece nan mes na Aruba, anto bon ta cu nan ta busca tur informacion prome cu nan establece nan mes. Loke ta birando un parti grandi di mi trabou ta hende of compania cu problema di belasting.

Evelyn ta haya cu e cambianan cu a sosode na nos pais manera reorganizacion di e departamentonan di belasting tabata necesario, pero loke a sosode ta cu tur e cambianan a drenta na vigor mes hunto y esey no a cumbini ningun hende. **BBO ta e prome paso di verschuiving di belasting directo pa indirecto; inkomsten y winstbelasting ta superhalto aki na Aruba.** Bo ta imaginabo ta gana bon placa y 61% di bo entrada ta bay na belasting? Winstbelasting a baha na 35% (inesesario) pero asina mes e ta hopi halto compara cu region. Na mi parecer tin cambio cu a bay mucho liher y cierto hende no ta custuma y ta sigui haci mesun cos bieuw den e sistema nobo, awor cu e tres departamentonan ta den un, no a custrumbra cu e trahamento integra ainda. Sra. Wever-Croes ta haya cu no a tene mucho cuenta cu e recurso humano den e cambio, dus e hende no ta sinti nan mes na cas. Dus e one-stop service cu mester a bin despues di e reorganizacion no t'ey ainda. E informacion ey mester ta ey den computer pa un y tur. **Mi no ta di acuerdo con tur cos cu a bay den e ley di BBO, cierto aspecto ta 'overkill',**

aunke no tin e cifranan oficial pa evalua, aunke mester confia den e conseheronan, pero si resulta cu profesionalnan cu a conseha gobierno no tabatin informacion corecto, lo ta algo hopi serio. Nan a bisa cu e sistema cumulativo lo 'val mee', cu inflacion lo 'val mee'. Ora cu bo ta traha den oficina manera di nos, bo no tin tur informacion pa contraresta esey. Cu BBO gobierno a elimina cierto incentivo fiscal cu tur su impactonan negativo riba e clima di invershon. Actualmente hopi ta warda esaki cambia. **Si gobierno di berdad kier atrae inversionista di nivel di calidad anto e mester tene cuenta cu incentivanan y no trece duda den con largo nan por haci uso den un sistema fiscal.** E inversionistanan local estableci lo sigui inverti pero esnan cu ta tambalea lo pense dos biaha promer. Un problema cu nan oficina a topa cune tambe ta e asunto di permiso di trabou pa un inversionista trece nan hende nan di confiansa pa run e lugar pa nan, no tin claridad den e asunto di permiso. **Mi tin caso cu hende cu pa motibo cu nan no ta sigur cu nan man drechi lo haya permiso pa run e compania nan ta dicidi cu nan no ta bin inverti na Aruba.**

Evelyn Wever-Croes a lanta den un famia cu hopi experiencia den politica. E ta corda como mucha di 12 aña e Augustus di '78, tempo cu tabatin tiroteo y acontecimentonan cu a impact'e riba un nivel hopi personal. **Na '83 ora mi tio (Betico Croes qepd) a haya tiro, e tabata un temporada hopi dificil p'ami.** Algun dia despues tabatin asesinato di un mucha homber (Alo Tromp) cu a bira un situacion na unda nos mester a sconde. E cosnan 'ki no mester a tuma

lugar nunca. Awor Evelyn tin 4 aña leu for di politica y di Gobierno y su number ta sonando keto bay den e 'gang'nan di gobierno. **Mi ta kere cu si cierto momento un apelacion wordo haci riba mi y e ta den bienestar di pais Aruba...lo mi pense hopi bon.** Politica ta un posibilidad, mi no ta descarta nada, mi no por djis bisa **NO** sin consider'e profundamente, pero den mi caso, berdad e ta depende di hopi factor. Mi tin tres yiu, y mi tarea principal na e momentonan aki, ta pa zorg pa nan tin un bon base, un bon educacion y na unda mi por yuda den esey lo mi yuda.

Loke si Evelyn ta lamenta ta e nivel di politica, e ta masha personal, y esey ta duna cualkier hende e miedo. E ta haya tambe cu e nivel di parlamento tambe tin cu subi mas, **nan tarea ta pa controla gobierno y mi ta duda si nan ta realisa esey. Mi no ta convenci cu tur parlamentario of e ministernan tur ora ta traha na bienestar di Aruba.** E no ta sigur si mester tin un criterio minimo pa bo bira politico. Como cu e tabata asina serca di politica, e sa cu na Aruba e carisma di un politico ta hopi importante. Hasta e ta haya cu pa hopi hende e ta mas importante cu e background di e politico mes. **Si e politico tin un carisma grandi e por gana e confiansa di e pueblo y si e por demostra di por haci e trabou anto mi no ta kere cu e mester ta un hende cu a caba Universidad.** Mi ta kere cu e mester ta un combinacion, pero si e lo mester tin mecanismonan cu por asisti un politico pa e por tuma un decision, e tin informacion necesario pa haci su trabou bon. Liderazgo den hende muher no ta accepta tur caminda, pero cu Evelyn Wever-Croes, esaki lo por cambia? 